

摘藻堂四庫全書薈要

集部

欽定四庫全書薈要

集部

元詩選初集卷六十一



欽定四庫全書薈要卷二萬四百二十一

集部

元詩選初集卷六十一 長洲 顧嗣立 編

王逢梧溪集

逢字原吉江陰人弱冠有文名至正中嘗作河清  
頌行臺及憲司交薦之皆以疾辭世居江上之黃

山自號席帽山人避地無錫梁鴻山未幾遷松之  
青龍江名所寓曰梧溪精舍自號梧溪子蓋以大  
母徐嘗手植雙梧於故里之橫江志不忘也又徙

上海之烏涇築草堂以居曰最閒園自號最閒園

丁明初以文學錄用其子通事令掖以父老泣請  
命罷之年七十卒洪武戊辰歲也有梧溪詩集七  
卷行于世近見坊間選本紀原吉事謂當張氏據  
吳大府交辟堅卧不就而又稱其為張氏畫策使  
降元以拒臺此何說也張士德之敗在丁酉三月  
其時張氏尚未降元也而謂其於楚公之亡有餘  
恫焉未知其為元乎抑為張氏也原吉一老布衣

沐浴於維新之化者二十年其子已通仕籍矣而  
謂其故國舊君之思至於此極西山之餓洛邑之  
頑未知其又何所處也論者好為曲說至引謝皋  
羽犁眉公為喻抑何其不相類乎然原吉之詩志  
在乎元則成其為元而已矣故附於遺民之例而  
錄之

虞美人行贈邵倅

大王氣蓋世力拔山七十餘戰龍蛇間得人為霸失人

虜有妾如花無死所夜寒蒼蒼星月高不惜傾身帳中  
舞大王恩深淺東海青血熒熒春草在當時早化劍雙  
飛四面楚歌那慷慨芒碭山開五色雲雌雉竟與雄鸞  
羣嗚呼後世亂紛紛非君擇臣臣亦當擇君

危腦帽歌讀五代前蜀史有感而作

白兜羅青衲襖金鴉翠翎七寶飾圓方反正無定式國  
人戴之天下惜後宮如花醉妝美君王無心冠帶理大  
木晝拔貪狼風猶汎樓船濟江水承平禮樂亦草草豈

但當時帽危腦可憐來者忘喪元紅纓未亂如雲擾君  
不見玉帛萬國先王朝會并如星麗九霄鳳凰麒麟在  
郊椒夔龍前殿奏簫韶

天門行

天門高高俯四極寸田尺地登版籍澤梁無禁漁者多  
瀚海橫戈恣克斥去年官饑私寇攘今年私醢官價償  
屠燒縣邑誠細事大將不死鯨鯢鄉

謂博羅特  
穆爾左丞

烹羊椎

牛醉以酒腰纏白帶紅帕首定盟軟血許自新禦寇征

蠻復何有國家承平歲月久念汝紛紛迫餬口羽林堅  
銳莫汝撓慎勿輕誇好身手春風柳黃開陣雲號令始

見真將軍

博羅特穆爾討方國珍兵敗被  
執為求招安至正辛卯歲也

銀瓶娘子辭

并序

娘子宋岳鄂王女聞王被執負銀瓶投井死祠今  
在浙西憲司之左逢感其節孝敬為之辭

蒼梧月落烏號霜寒泉幽凝金井牀綺疏光流大星白  
夢驚萬里長城亡女郎報父收囹圄匍匐將身贖無所



官家聖明如漢主，妾心愧死綈縈女。井臨交衢下通海，  
海枯衢遷井不改。銀瓶同沈意，有在萬歲千春露。神采  
魂今歸來風冷然，思陵無樹容啼鵲。先王墓木西湖邊，  
任月山少監職貢圖引

好風東來快雨俱，夫須亭觀職貢圖。啟首高鼻深目胡，  
冠插翟尾服繡襦。革帶鞢褭貂襜褕，左女執盞右執壺。  
手容恭如下大夫，酋妻髻椎將湛盧。五采雜珮相縈紆，  
轉顧飛虎飛龍旗。鏤耳者殿，帕首驅瓔珞。袒跣兩侏儒，

一檠木難珊瑚株一戴玉琢狻猊鑪神焚髮髻狀乳獬  
復誰牽之鬢髮鬚最後我弁飾寶珠若將入朝謹進趨  
禿奚踉蹌亦在途錦膊驄帶汗血駒尊貴卑賤各爾殊  
經營意匠窮錙銖唐稱二閭道元吳今也少監稱京都  
少監材抱豈畫史禹跡曾為帝親理河伯川后備任使  
無支祈氏甘胥靡大德延祐貞觀比輦陸航海填筐篚  
鳥言夷面遠能邇少監臨古不無以趙公商公暨高李  
頤頤霄漢嗟已矣霽雲曙開儼斧戣包茅不入頤誰泚

周編大書王會禮安得臣臣奉天紀陋儒作歌歌正始  
淮安忠武王箭歌題垂虹橋亭

淮王昔下江南城萬竈兵擁雙霓旌錦裘繡帽白玉帶  
金戈鐵馬紅鞶纓阜鵬羽箭三十六一一插向魴魚簞  
鹿麕晝號猿抱木王師所過全生育彤弓親授聖天子  
弓影射入東吳水水波恍漫銅柱標仰見浮屠半霄起  
王當是時戢武功指顧草樹生春風宋家降璽朝莫得  
思罷貫革垂無窮浮屠上層龍所宮寶盤紺碧蓮花同

弦張滿月報駟發忽露半筈薌雲中鏡歌啁轟鼓笳競  
父老頓足驩聲應泗州使返睢陽亡漢關將入天山定  
兩賢成敗關衰盛雄材逸氣王誰並我浮扁舟五湖興  
載拜何由重安靖猛士經過合深省

揚子舟中望鵝鼻山時聞黔南消息

山環芙蓉城私怪鵝鼻狀奔濤鎖長薄大石

山名

凜相抗

勢雄千軍壘氣尅萬鍾藏草樹春不蕃莓苔滑難傍剛  
風過靈雨復值桃花漲破暝鷗鷺盤乘陰龍魚王飄鼓

一葦間攬之膽增壯謝安晉元臣豈跼江海量蒼生方  
顛連其敢遂疎放黔陽百粵地黃霧吹虎輶再觀神秀  
姿不止西北向煒煒蒼精出閃閃白月漾三叫馮夷宮  
吾奚獨惆悵

題烈女廟

并序

女何江陰人少有容操五季時避亂前湖舟中賊  
持兵犯之何泣曰吾身墮汝手肯從吾禱之於天  
於父母乎賊由是少懈何乃起立且拜且祈秉間

竟投水死後里父夢見何曰吾當血食此地伺湖  
成田則廟貌祀我旣而果然今廟在華藏寺南郡  
志所載畧異逢蓋得先大母所傳云

遺廟湖陰四百年斑斑江竹映嬋娟魚龍水落萑蒲外  
鷄犬村成縻柘邊不待清名垂女史尚存貞魄降神弦  
君王社稷今焉在伏臘粢盛自儼然帷箔夜涼臨月榻  
珮環晨響起雲輶湘靈鼓瑟虞風盛蔡琰聞笳漢鼎遷  
嗟彼生還羞故國何如死節報皇天明妝靚服黃塵裏

重為傷時涕泗漣

錢塘春感六首

紫罽輶車從六龍盡隨仙曲度青空蒼山樓闕旃林裏  
赤羽旌麾野廟中百姓未忘周大賚成都元有漢遺風  
流鶯不管傷春恨衝落桃花滿樹紅

王氣凌虛散曉霞虎闌麟閣靜烟花中天日月迂黃道  
滄海風雲冷翠華望帝神遊夔子國烏衣夢隔野人家  
當時舉目山河異豈但紅顏泣塞笳

周南風俗漢衣冠五色雲中憶駐鑾  
璫瓊檜高藏白獸蕊珠花發降文鸞  
河通織女機絲溼雨歇巫娥翠黛寒  
滿地吳山誰灑淚一江春水獨凭闌

日華初動袞衣明劒佩千官隱繡楹  
五色黼黻開玉座九重湯藥下銀罍  
書題鳳尾仙曹喜恩浹螭坳學士榮  
文化有餘戎事略銅駝草露不勝情

瑤池青鳥集觚稜白塔金鳧閑夜燈  
雲母帳虛星采動水晶宮冷露華凝  
驪山草暗墟周業鄒塢花繁失漢陵



白馬素車江海上依然潮汐撼西興

金爵觚稜月向低泠泠清磬萬松西五門曙色開龍尾  
十日春寒健馬蹄紅霧不收花氣合綠波初漲柳條齊  
遺民暗憶名都會尚繞湖濬唱大堤

讀謝太皇詔藁

半壁星河兩鬢絲月華長照素簾垂衣冠在野收亡命  
烽火連營倒義旗天地晝昏憂社稷江淮春漲泣孤嫠  
十行哀詔無多字落葉虛窓萬古思

讀國信大使郝公帛書

西北皇華早東南白髮侵雪霜蘇武節江海魏牟心獨  
夜占秦分清秋動越吟蒹葭黃葉莫首宿紫雲深野曠  
風鳴籟河橫月映參擇巢幽鳥遠催織候蟲臨衣攬重  
裁褐貂餘舊賜金不知年號改那計使音沈國久虛皮  
幣家應詠藁砧豚魚曾信及鴻鴈豈難任素帛辭新館敦  
弓入上林虞人天與僂竒事感來今

公羈旅日有以鴈四十餉公內一鴈

體質稍異命畜之于後鴈見公輒張翮引吭而鳴公感悟擇日率從者二十七人具香北拜二人舁鴈跪

其前手書尺帛親繫鴈足且致祝曰累臣某敢煩鴈卿  
通信朝廷鴈其保重欲再拜鴈奮身入雲而去未幾虞  
人獲之於苑中以所繫帛書託近侍以聞上惻然曰四  
十騎留江南曾無一人鴈比乎遂進師南伐越二年宋  
亡書今藏諸秘監河  
南主客劉澹齋云

### 憶舊遊二首

醉酒高陽里題詩左氏莊  
碧雲垂草帶紅旭散花房  
流水循除活飛絲拂鬢長  
座中誰潦倒遺却紫香囊

紫纍妨過馬青苔委佩魚  
名通天上籍腹有架間書  
春水浮齋艦山雲落板車  
尚懷仁里好耕鑿對休居

題垂虹橋亭

長虹垂絕岸形勢壓東吳風雨三江合梯航百粵趨  
葑田連沮洳鮫室亂魚鳧私怪鴟夷子初心握霸圖

感宋遺事

五月無花草滿原天回南極夜當門龍香一篆魂同返

猶藉君王舊賜恩

至元十三年正月已延丞相入杭二  
月起宋三宮赴上都五月見世祖皇

帝尋命幼主為檢校大司徒封瀛國公十二日內人安  
康朱夫人安定陳夫人二侍兒失其姓浴罷蕭襟閉門  
焚香於地並雉經死衣中有清江紙書云不免辱國幸  
免辱身不辱父母免辱六親藝祖受命立國以仁中興

南渡踰三百春秋受宋祿羞為北臣大難既至守於一  
貞焚香設誓代書諸紳忠臣義士期以自新丙子五月  
吉日泣  
血書

自乾封歸省祖壠過大南嶺向玉山

從親客殊鄉所忻塵事屏茲承有方役願言千里騁朝  
辭縣北山午踰虛南嶺溼嵐沍浮陰高日下疎耿亂田  
麥蕃腴絕壁松秀整登登復輿勞委委羅徑永異跡辨  
夔足獨往見僧影沖襟暘寬曠玄趣集深靜丘墓躬汎  
埽庭闈念定省僕夫戒期程烏啼復予警

復如乾封晚經漁浦

窮曠經漁浦寒水白於練  
總總星東出獵獵風北轉  
眼中獸蹄過笛裏魚狀變  
稍聞刁斗應漸喜烟火見  
誰家長林根繫艇沙渚面  
天含瀟湘思山錯吳越甸  
承平謝憂患少壯忘羈賤  
瓜橋往未遑雲源訪殊便  
明涉子陵灘桂酒同一奠

敬題諭淮安朱安撫詔後

附詔文云大元皇帝聖旨諭淮安州安撫

朱煥據陳楚客奏臣與朱安撫同年又有通家之好自戊午歸順之後不相見者十有八

載今王師弔伐諸道並進數內一路領漣河  
清河將士攻取淮東未附州郡竊恐城陷之  
日玉石俱焚臣於故人情分不容緘默且彼  
所以嬰城自守者無他原其本心但未知趨  
向之方初無執迷抗拒之意今大江南北西  
至全蜀悉入版圖若蒙聖慈特發使命宣示  
德音開其生路彼亦識時達變之士也寧不  
以數萬生靈為念乎臣昧死上言伏候勅旨  
准奏今遣使特旨前去宣布天信若能識時  
達變可保富貴應在城守禦將帥同謀趨順  
者意不殊此故茲詔示想宜知  
悉至元十二年七月漢兒字書

九鼎沸莫止大厦傾莫支太陰初陽不得燭下土小龍  
望望閩之陞六宮掩泣向北去孤臣憑城尚南顧也知

天命有所歸忍為生靈貸生路當時不死良為此至今  
人說姜與李君家富貴八十年露臺風館啼猩鬼世事  
茫茫難具論遺詔幸得傳諸孫烏絲細字書題罷黃葉  
乘秋正打門

聽鄭廷美彈琴

畫闌月照芙蓉霜博山水暖薔薇香石屏石几青黛光  
鄭鄉君子琴中堂榴裙蕙帶辭羅洞玉珮珠璫脫飛鞵  
何處春深雲滿林小巢並語桐花鳳君不見湘靈鼓瑟



湘江澣苦竹祠荒愁暮雨遺音一聽增感傷使我無言  
重懷古重懷古鷄喔喔明星爛熳東城角誰家尚奏桑  
間樂

婦董行

并序

婦董滕人劉進妻也進與兄順並以勇稱金季山  
東亂盜蜂起因共募丁壯保里閭天兵駐嶧山進  
單騎覘之中流矢死順徙家淮南舉室溺淮水董  
為宋招撫呂文德裨將所獲欲犯之度不免乃謂曰

夫喪不遠家難薦臻一身流離婉在旦暮死生非  
我有願將軍勿疑夜果生一男先是順已入濟州  
懇於石太尉珪曰順有弟不幸沒於敵其妻在孕  
為南軍拘幽舟中萬一不得收遺息使弟為厲實  
順之罪也惟明公是圖石為發步卒三百人跡其  
所往次淮揚始知董所在陰使人偵之生子蓋三日矣  
及見具道順意董悲感不自勝且拭淚曰妾以姪  
不得先夫死今幸不辱先所天使有後皆伯賜敢

名此子曰伯祐以志不忘遂抱授偵者目送數十  
步投江以死至正五年秋進玄孫士行語其事於  
逢逢高其節義作詩哀之

北軍南軍和議時兩壘對立龍鸞旗羣雄棋峙國瓦解  
乃與婦董光門楣星辰錯亂風雲氣乾坤造就冰雪姿  
渾家性命葬魚腹一舸涕淚隨鷗夷長眠自足為義鬼  
後死只望子孤兒兒在腹中兵在目憶夫心頭臂消肉  
日晝慘慘陰靈啼夜黑冥冥波浪觸馬駝磧遠暗塵土

鷄犬村空疎樹木嶧山誰收白玉骨蔡州地限黃金屋  
太尉前歸明主化招撫姑存寡妻宿羞看人面問消息  
強通語笑寬羈束伯順見義勇著鞭銳士協力鋒爭先  
道傍弩伏荆棘底掌上珠還江海邊將門有後傳世世  
墓祭無所從年年湘妃摻袂遡寥廓漢女結珮窮幽玄  
縞衣綦巾共縹緲文魚赤鯁長周旋脣亡未久齒亦喪  
獨聞其風猶凜然中原山河想如故目斷幾點滕州煙

逢為是詩已士行復述順一事尤卓卓順既得伯祐  
以行時董死事覺招撫發步卒亟追之賴左右弓弩

手散去還白太尉甚義之處之麾下凡兩致太尉命  
往覲太祖皇帝於魚兒泊之行營賜金幣鞍馬且命  
撫循邢磁贊黃十餘城用寧謐上功受黃金符官昭  
勇大將軍行右副元帥濟兗單州等處管民長官在  
官十餘年士民翕服晚有子五人未老棄官以伯祐  
襲其爵為奉訓大夫濟州管民長官是年至元元年  
也故錄於詩後以  
俟執史筆者采焉

### 簡黃大癡尊師

十年淞上籍仙關猿鶴如童守大還故舊盡騎箕尾去  
漁樵長共水雲閒吹笙夜半桃花碧倚杖春深竹筍斑  
顧我丹臺名有在幾時來隱陸機山

過丘以敬管句吳山別業

梓潼祠畔敞林扉隱隱鷄聲落翠微  
銅篆解將還省署銀魚忘却挂朝衣  
石崖溜雨藤根白籬落緣雲瓠子肥  
想見秋風遂高隱中原野馬正狂飛

奉題濟禮哈坦平章丹山隱玉峯石時寓江陰

昭代優勲舊平章謝闕班堂開新綠  
野玉隱小丹山曉曉文璀璨孚尹氣  
往還崑丘玄圃畔台嶠赤城間不假  
工凋琢元承帝寵頒靜容賓從仰明  
燭鬼神奸秩禮均

恒岱謙光俯粵蠻儼持周勃節秀擁楚巫鬟樹錯珊瑚  
朶苔封翡翠斑座裊聯綺轂車轂映朱殷或跂雙公鳳  
時窺一白鵬爐香嵐勃勃簷雨瀑潺潺地縮三鰲島天  
長九虎關文饒淫翫好靈運癖躋攀日月由來繞風雲  
不暫閒殷曾求傳說漢亦聘商顏金匱盟藏券青春詔  
賜環皇基同永固國步罷多艱館閣題千首琮璜價百  
鐸願移銘盛烈褒史著人寰

奉寄趙伯器參政尹時中員外五十韻

詔立淮南省符張閫外兵風雷朝煥發牛斗夜精明參

政材超偉元僚器老成武林多樹政禁籞舊蜚英鳳暖

文章蔚鯢秋羽翼橫天池今並奮嶰管後和鳴地要尤

膏沃時危必戰爭輔車依海岱衣帶限蠻荆玉葉開王

邸煙花匝子城萬艘鹽雪積千里稻雲平織貝殊珍粲

紅樓豔曲縈並緣胥狡黠貨殖駟驕盈汝襁初萌起河

流漫妄行鎮綏增屏翰贊畫授權衡愛稼須除螣憐牛

貴搏蝨式蛙曾霸主斬馬乃書生青汗三千牘丹心一



寸誠相臣連萬騎郡邑望雙旌  
甌社湖移蚌縹絲井露  
鯨里無安堵樂野有望塵  
驚鳥鹵煙侵燧孤嫠膽碎鉦  
五賢迷古轍六詠歇新賡  
瓦礫皆王土逋逃本爾氓  
長驅勞組練盡埽愧攬槍  
喻擬相如檄降懲白起坑  
跋胡狼曷備毒尾蠆難撓  
濟猛收神略疏恩渙虜情  
佇聞鹿柵下莫作鬼方征  
回鶻卑唐室天驕撓漢營  
乾坤一羽扇社稷幾羊羹  
林杜交加影芙蓉裊娜莖  
超然延爽笏肅若衛寒更  
慮念真如是功勲孰與京  
誓清懷晉遯虛

左慕齊嬰好定龍蟠價毋登狗盜名石洪重脣辟韓愈  
建封迎故典何其盛斯文與有榮中州襟陝隴上國掖  
幽并麟閣將來繪鷄壇宿昔盟芻蕘言慎擇葵藿義同  
傾契闊商參恨栖遲畎畝耕小齋餘苜宿四境半蕪菁  
酒憶涓涓縹魴炊箇箇頽悲歌垂短褐慷慨睠長纓親  
病常憂懼身竒鮮弟兄君公終隱迹克國燁家聲楚角  
關山晚吳陵草樹晴鷺知幽谷候鴈識大江程報政梅  
全發封詩月迴清遙應語何遜開閣少陰鏗

贈別浙省赫赫左丞國寶自常州移鎮徽州三十韻時歲癸巳

武德興元運文恬近百年一隅初難作四境遂兵連  
斧宸朝元早彤弓授命專馮岑材並濟李郭駕爭先  
路入延陵邑星分左轄躔著名黃閣上虛位紫宮前  
汗血駒千匹跼跼士兩甄帳寒龍守劒城曙虎飛  
旃跡埽齊門瑟身親楚醴筵慧山屏列野震澤鏡涵天  
刁斗軍中捩鉏犁亂後田白無遺朽骨青有續炊煙插羽書間署封

泥詔撫邊陣容催畫鼓逢蠱氣動樓船舊政猶霜肅新安  
素地偏蜚精嘗感夢帝子或逢仙漆葉雲羞密茶花雪  
妬妍誦弦家柳比冠蓋里班聯鄒魯流風洽甌蠻習俗  
遷比來疲賦歛況復值戈鋌餽稍官曹待謳歌父老傳  
挽屯吳幼節總體漢文淵裴度歸休近羊公卧治僂鼎  
彝今燁赫韋布數周旋小閣牛行炙長楸鶻試拳王融  
五雜組孫武十三篇華夏殘河汴神州歸薊燕殄除纔  
蚺螭睥睨滿鯨鱣狂斐言姑及高明義莫捐憂君尚有

疏儻寄麥光牋

題沈氏別墅

小築洄塘上春陰水暫寒  
柳遮蓮葉艇花礙竹皮冠  
生理尋常足閒心一寸寬  
知予厭奔走絕口不言官

壬辰冬十一月避亂綺山簡丘文中貢原父二  
教授

雲掩金戈日風生鐵馬塵  
亂離誰是主貧賤獨為民  
鷄犬人煙絕黽黽草木鄰  
喜聞同舍語天已厭荆榛

仙茅塢

夜宿仙茅塢金鼇湧亂山天風來海外煙火落人間白  
石思同煮青蘿喜獨攀絺衣弄華月公子亦忘還

登越城故基

吳王臺對越王城歲歲春風燕麥生一片范家湖上月  
照人心事獨分明

和張率性經歷竹枝詞二首

溪上鵝兒柳色黃溪邊花樹妾身長浮藻可是無情物

采得歸來好遺郎

道傍花發野薔薇  
綠刺長條絆客衣  
不及沙邊水楊柳  
葉間開眼望郎歸

無家燕

嗟嗟無家燕飛上商人舟  
商人南北心舟影東西流  
芹漂春雨外花落莫雲頭  
豈不懷故栖烽暗黃鸝樓  
樓有十二簾一一誰見收  
衆雛被焚蕩雙翅亦斂  
擘含情盼鬼蝶失意依  
訓猴茅茨固低小理勢難  
久留昔本烏衣

君今學南冠囚燕燕何足道重貽王孫憂

此詩為淮楚陷沒諸藩王

避難浮海而作

秋夜歎

大星芒鬣張小星光華開皇天示兵象勝地今蒿萊河  
岳氣不分燭龍安在哉參贊道豈謬積陰故遲回疎風  
夜蕭蕭野燐紛往來安知非遊魂相視白骨哀汨汨飲  
馬窟雲冥望鄉臺于時負肝膽慷慨思雄材

積雨齋居



積雨生夏寒盛陰失朝景白鳥巢依閣青梧葉垂井幽  
觀知候變遠引忘世稷淮水方漫淫吾甘繫煙艇

特侯歌

并序

昌國州達喚噶齊高昌特穆爾平章邁珠之猶子  
也海寇犯境侯連與戰破之衆寡不敵或勸侯遁  
去侯曰是吾死所也遂死之江浙省參政樊執敬  
為文遣使致祭請謚於朝達為作歌云

仙居縣丞寇海邦白晝突入千矛鏖特侯親騎大宛馬

快劍躍出蒼龍雙鬚張皆裂赫如虎殺氣雄風助虓武  
髑髏擲地血飛雨短兵未接寇偃鼓天南弧矢夜掩光  
狼角赭赤雲玄黃洪濤鯨鯢去咫尺再戰身與城存亡  
艤艫千百水犀手主者誰歟什旗走岳立不轉鏌殺之  
殉忠國家良亦厚君不見台州牧長金兜鍪氣節自是  
名臣流情鍾兒女挫堅銳卒墮賊計空貽羞男兒真偽  
那料得長松古柏寒增色鴻飛冥冥我何及落日荒山  
淚橫臆

送宋宗道歸洛陽

選郎分手楚天涯，萬里春明穩到家。  
庭下已生書帶草，馬頭初見米囊花。  
汴淮淚漫經梁苑，星斗參差犯漢槎。  
中國未應風俗異，舊京寧覺路途賒。  
鮫宮獻珮當明月，鵲殿吹笙隱太霞。  
貂敝世憐蘇季子，賦成人哭賈長沙。  
若為撫事傷遺跡，正用懷才待物華。  
聞道鄉閭諸父母，杖藜期看馬卿車。

毗陵秋懷



夜宴葉氏莊曉登悠然樓作

百尺飛樓俯碧湍六峯秀色繞欄杆  
杏花落盡東風惡燕子歸來社雨寒  
夢裏香煙生繡幌酒醒紅蠟膩銅盤  
一春樂意朝來好千里家書席上看

送朱自明辟閩憲奏差

閩中烏府小清都列郡山巒紫翠紆  
王化直來天北極文星多聚海南隅  
暖塵花氣隨驄馬春日榕陰滿鷓鴣  
況有翰林持使節憲郎應得効馳驅

翰林指歐陽學士時除閩使

奉題先世所藏嚴子陵小像

千仞臺臨七里灘  
羊裘鶴髮老魚竿  
客星帝座分天象  
潁水箕山並曉寒  
遂起後塵甘黨錮  
尚存餘烈愧南冠  
桂叢苯蓂蘋花薄  
悵望高風一羽翰

題馬洲書院并序

馬洲書院者孔聖五十二代孫元度昆季所建也  
其五世祖若罕高抗不羣長於春秋當宋南渡自  
闕里將之衢留滯興泰見河流達南江詢之老人

曰此龍開河也西北通淮泗因嘆曰吾洙泗龍泉  
之支流其在茲乎遂築室河上與其子端志各授  
弟子業從遊日衆乃有畱田百畝人助以力官復  
其稅戒子孫治生勿求富讀書勿求榮邑大夫嘉  
之易名龍開河曰敷教示崇化也年六十卒葬河  
之陽端志克守父道薦辟不就淳祐元年冬邑燬  
于北兵元虔避地是洲咸淳間書院落成教授復  
如初然皆無後今崇聖寺旁惟破屋蔓草遺像瓦

爐而已逢懼變遷殆盡故敘其概于壁間庶後之  
起廢者得以考焉詩曰

蚪斗秦皆廢靈光魯獨存豆蓬漂海國丹腹暗淮村苔  
蘚花侵礎蒲蘆葉擁門青春深霧潦白日老乾坤德化  
三王並威儀百代尊郊麟初隱遁野兕遂崩奔先輩俱  
冥漠諸生罷講論斷編塵樹冷遺像網蟲昏盡變衣冠  
俗終歸禮義源江南遊學士瞻拜敢忘言

送郡知事李仲常還金華



列郡歌岑睢孤城頌李膺文華仙掌露人品玉壺冰畫

本黃荃學詩兼畢曜能關河千里道風雨十年燈薦鶚

知無忝登龍貴早承朔雲低紫禁東壁映青綾郎署新

帷幄儒門古亘登黿梁初隱見羽檄遂飛騰軍事諸曹

服元僚太守稱芙蓉秋獨卧驃騎日同興衆仰寬民力

誰堪作帝肱埽除塵瀕洞屏蔽雪侵陵野戍銷鋒鏑田

家罷棘矜崑崙天柱正宸極泰階升顧此心常切多君

興遠秉宗桃紅霧斂豐草綠波增喻蜀漢司馬歸吳張

李鷹官情輕比蜨行色澹于僧三洞金晶發雙溪白練  
激過家饒賞咏來紙細緘滕

塞上曲五首

木葉滿關河轅門肅珮珂將軍提劍舞烈士擊壺歌月  
黑輝銅獸風高嘯紫駝不堪城上角五夜落梅多

將令傳中閫交驩浹兩軍地形龍虎踞陣伍鳥蛇分清  
野輝燕日黃河瀉岱雲生靈如有賴絳灌不無文

月照小長安風生大將壇虎皮開玉帳牛耳割銅盤伯

氣寒逾肅軍聲夜不譴皇天眷西顧慎取一泥丸

絳革帶鉤膺聯鑣獵楚陵白肥霜後免青沒海東鷹千  
里榛蕪闢三年和穀登中郎示閒暇呼酒出房爇  
諸夏皇威立三邊虜氣衰角弓分虎圈乳酒下龍墀蟲  
午歎氛遠鼉更窟宅移輿圖欲盡入中道勿頒師

聞武昌廬州二藩王渡海歸朝

茅土分封在金章渡海歸事殊生馬角心愧著戎衣星  
月晶光並山河帶礪非秋風紫塞上依舊鴈南飛

和張率性推官小遊仙詞二首

西王春宴百娉婷  
玉碧桃花滿洞扃  
自飲一杯瑤屑露  
東風吹夢不曾醒

雲幢煙節紫霞裾  
齊御冷風集步虛  
若受人間塵一點  
長門又屬漢相如

登雙鳳普福宮東樓贈吳道傳時周境存隱君  
同席二首

道人獨坐覽輝樓  
海底青天入座流  
燕子飛來又飛去

遊絲挂在玉簾鉤

樓殿岩堯上赤霞水紋蟠鳳卧靈槎石碁盤靜香煙直  
簾下雙頭百合花

望江郎石

仲春天氣佳萬象欣改色我行六峯外遙見江郎石二  
儀闕混沌牽牛委晶魄鼎列台輔姿玉蘊珪璋德三神  
浮瀛海噴薄東一極鉅鼇因戴之仙宮晃金碧斯連厚  
坤軸乃棄姑笈域直上青蓮花或隕樵舍側安知非異

境自與三神敵于時攬深秀雲霧忽巾褱微風稍飄颻  
空翠疑亂滴雜英敷陽豔嘉木生午寂交交黃鳥音好  
在千丈壁二年思晤對百里今咫尺煙波動落照道路  
陰已夕尚戀女媧功躊躇望西北

觀錢塘江潮時教化平章大譙江上

蒼蒼吳越山對峙東江腹江開白銀甕一浪天四蹴金  
晶王高秋風露氣轉肅常年駭壯觀委巷雷擊轂今年  
官增威旌麾被川陸羅衣繡龍鳳玉帶緣螭栗牙牀錦

屏帷蠻毯隨步戲溫溫香卷陣婉婉眉闌綠微聞伊梁

音淥酒光動穀鮮醲片晌盡望姓空側目懼成庾郎哀

竊效杜陵哭冥頑鱗

一作鱣

魚彙屢覆舟萬斛梟雄扈將

軍

謂福建扈海元帥

竟作机上肉大漫交烽火血齒腥草木地

媼為之愁兼恐河源縮熟聞靈胥廟歲祭莫敢黷三叫

三酌觴願與赤水族錢王射強弩至今有遺鏃何當起

英魂少助八州督

時汝穎等州陷

中原日無事海寓蒙景福尚

虞多戕殘洒淚逃亡屋

往歎名

一作陽明

開化二鄉掩骼

分藩多賢勞不敏忝賓客雖無官守縻亦復與言責二  
鄉虔劉禍慘甚長平厄先王制禮經孟春當掩骼僕夫  
有難色款段纔任策駸駸度岡坂眇眇循藪澤稍稍煙  
微青歷歷野四白遊魂行草上遺老候道側我豈物役  
徒茲來出心臆皇天久下憫赤子非寇敵鴟鳥何不仁  
銜啄血更瀝因歌戰城南風悲淚狼籍

憂傷四首上樊時中參政蘇伯修運使



古青徐十連五屬桑棗墟黃河失經人化魚呂梁設險  
豺為徒船多纜通玉帛貢車多始登牛馬途守無官軍  
法度疎居無鉅室城隍虛欲去鹵掠當何如

合置官軍  
合實郡縣

古青徐歲久致君心煩紆

竹笠黃

時有盜戴竹  
笠拒官軍

黃金兜鍪勢相當兜鍪本居大將

壇左劒右印增威光邊隅將校望塵拜州縣曹佐聞風  
僵況從元首授元柄稍忤言意違軍令不因菑疫自焚  
船那致生靈輕隕命竹笠黃兜鍪相當難走藏兜鍪旦

晚先戎行

官柳場青芒芒野鷹交飛撲馬驤年年十月轅門張元  
戎始來坐虎牀翼舒箕哆魚麗行鼓進金退兵家常起  
伏見譏孫武子句卒貽笑曹成王千夫散盡旌旗定偏  
裨隊伍相呼應幾處私恩誤主恩一回酒令行軍令酒  
醉邊隅事不聞邊隅擾擾多煙氛

江海壖家家浮生多在船船居無租出無禁競賣田宅行鹽  
錢私鹽漸多法漸密隩裏干戈攘白日尋常惡孽不肯

除本固枝蕃禍非一虎符龍節王者師赦過錄功先自  
欺諫臣上疏劾已晚蔓延及今歸咎誰地官合為弘遠  
計鹽價減徵同賦稅盜源既清民瘼除五風十雨歌康  
衢

小比首歌

水精生苗月牙直慧芒披雲電流隙蟄蛇斷尾短草間  
海鷗褪翎霜雪色宋斤魯削讓隋刻金錯錐刀豈其敵  
吳鴻扈稽飛著體不曾為主開邊鄙嗟茲神物久泥滓

用之可以報國士簷氷卓筋日黯空稍玩股掌生雄風  
鮫魚室卧縞帶影長鉞辟易萬雉墉古昔客搃秦王胷  
幾什翠鳳咸陽宮由來意氣泰山重命甘燎毛不旋踵  
誰隳古制鑄小之佩稱衣冠加琬琰我歌三嘆淚滿裾  
曹鱣豫鼎無時無

客金陵遇有以茂才異等為薦者以病歸泊龍  
灣二首寄丁仲容婁行所二先輩

拖樓醺酒出金陵病後衣裳體不勝風雨滿江寒顛顛

庭闈何處髮鬢髻周璆實下諸侯榻王式虛蒙博士徵  
一曲離歌凝客思幾行疎樹隔漁燈

鳳凰臺上酒如川醉擬題詩李謫仙鑿齒已成耆舊傳  
眞長空覓孝廉船十年螢案書連屋八月龍灣浪拍天  
無那病懷兼旅思白雲遙望夕陽邊

送于子實辟淮閫掾

淮海風高急鼓聲潁州風起照淮西餽糒幾道通流馬  
樓櫓重城望火鷄星入夜寒芒角動地連秋暝瘴氛低

君今掉鞅元戎幕，肯慰流亡父老啼。

宮中行樂詞六首

羽獵罷長楊，宸遊入未央。鸞開雙畫扇，鶴舞百霓裳。玉  
盞瓊花露，金盤紫蔗霜。長門誰閉月，流影在倉琅。

望幸影娥池，微吟紈扇詞。露盤迎月早，宮漏出花遲。珮  
雜鑾和響，雲連雉尾移。君王肯時顧，從愛趙昭儀。

明月窺彤管，雙星直綢軒。宴分王母樂，詔擬薛濤箋。穀  
雨親蠶近，花朝拾翠連。魚龍曼衍戲，吹進玉階前。

積翠激波闊披香暖殿開天低烽火樹日動蔓金苔獼  
髓勻猶溼羊車過不回賸陳列女史萬一漢皇來  
芍藥為離草鴛鴦是匹禽君無神女夢妾有楚王心日  
短黃金屋宵長綠綺琴相將戒霜露拜月繡簾陰  
金鑰魚司夜瑤箏鴈列春後庭通綺閣清路接芳塵同  
備三千數誰辭第一人君王壽萬歲行樂此時均

景陽井

踏臂歌殘辟月昏驪龍猶藉井生存石闌漫浣臙脂色

不似湘筠染淚痕

過楊負外別業

負外名秉字文載濟南人官浙省負外郎以累斥至正十六年

淮張之辟乃遺訓

二子卣卓自經

翠羽無深巢麝香無隱穴由來老蚌珠淚泣滄海月於  
乎楊負外竟類膏自熬憶昨佐南省四境正騷屑朝廷  
忌漢人軍事莫敢說遂罹池魚殃迺被柳惠黜寄身傍  
江潭乃心在王室星躔錯吳分氣候乖鄒律天風搖青  
蘋徒步空短髮譙玄初謝遣龔勝終守節譬如百鍊鋼



不撓從寸折又如合抱松豈藉澗底蘂我時浮扁舟  
外候朝日荒郊無留景別業自深鬱時清議勸忠公  
果昭晰大名流天地當與河水竭結交卣卓間遺言  
見餘烈

三貞篇寄納琳哈刺參政幕下僚友

梧西女陳氏顏色絕勝玉阿耶燈窗下古傳常暗讀義  
須嫁官人麻象心所足兵麾忽東指烽火蔓平陸魚鼈  
遭顛連雞狗同迫逐猘猢猱其口反噬机上肉母子泣

相誓寧死不汝辱春輝黯門楣寒日照鬼錄皇天實鑒

臨家廟為慘肅

陳氏母曾宋直講確之七世孫女

髻婦

惠婦吳俱縣人

亦在難

自判受命獨臂血濺賊衽賊歎為斂縮差差白刃間偉

節驚耳目荒野雲雪暮緬想會深竹水流風悲鳴星迸

萬羽鏃回首陷沒地何限委溝瀆大參行當來卹典具

簡牘前湖百世祀

謂五代時烈女何氏

明妝儼車服從以雙素鸞

配享疇敢黷孤蓬任漂轉餘齒寄草木倡茲三貞篇庶

用矯浮俗

送楊子明知事從觀孫元帥分制沿江州郡

寒日動大江鞍馬散滄洲  
漚光滅沒外迴見冰梁浮壯  
士無人色旗羽風颼颼  
楊君志弧矢笑被黑貂裘  
祭鞍千仞岡掉鞅萬斛舟  
先聲掠淮甸遙制三邊州  
元帥統將權言責在軍謀  
一言關興喪跬步分陽秋  
天地屬閑塞波伏蛟龍湫  
孤煙起天際薄暮青轉幽  
百里靜鷄犬豈但窮兵由  
雪貿薺麥生猶聞鑄戈矛  
頻年竭土壤經時委川溝  
行其所無事凋瘵或少瘳  
耀德不觀兵當今

第一籌君昔甚惻隱曲宥千俘囚歸裝輕于葉廉價重  
琳球敝邑蒙薦臨多暇獲讌游鳳凰巢阿閣黃鵠宜遠  
投菜竹霜實繁知止疇與侔蘆根短刺水鷺斯空啾啾  
顧予麋鹿姿蓬藿翳林丘行藏任本性道義期加修

夜坐

落日秋氣昏回溪夜噴薄幽花歆露榭孤螢隕風閣沖  
襟謝煩歎廣簟生離索躑躅履望明河南天正飛鵲

義僧行

世降道淪喪盛事罕見之我歌義僧行斬取國士知僧

臻生夏浦俗號徐大師勇敢重意氣赤手可獵麋張忠

郭解流任俠不計貲臻願出門下致死誓不移盜尋寇

馬洲魚肉乎蒸黎元戎堅營壁大姓深溝池壯哉張父

子分率脫項兒父擒子死難家不得斂屍臻間切齒恨

恨死不同時夜即操斧刀奮身斫藩籬徑入牛宮內斧

斷張繫維手殺盜六人力挽間道歸妻孥拜堂下金幣

謝所私上公賜巾裳欲以好爵縻幡然掉臂辭還山弄

摩尼方今國步艱中外罹瘡痍銅虎盡懸綬鐵馬誰牽  
旗嗟爾匹夫臻足張三軍威何不食君祿為君靖淮夷  
收名魯仲連千載為等期天秋黃葉脫日暮玄雲馳歌  
詩節鼓吹用壯吾熊羆

壯士歌

明月皎皎白玉盤大星煌煌黃金丸壯士解甲投馬鞍  
蒺藜草深衣夜寒劒頭飲血何時乾

寒機女辭

鴛鴦機滿東西舍雪蠶繰來日相射世俗競染紅藍花  
妾心鍾愛金絲柘君王錦繡焚殿前天孫鳳梭蛛網懸  
織成雲霧製龍袞萬一熏香分御筵

君家柳

君家柳萬株一色鵝黃酒龍鱗波暖裊翠煙飛花直渡  
江南天倉庾立曉燕穿午薄莫啄木聲丁然腹中樹蝕  
皮齧馬舊陰半減金城下長條短條屬行人猶有持斤  
睨之者秋來大地落葉鳴心憶陽春淚如瀉

夜何長三疊寄周參政伯溫鄔僉院本初

夜何長日苦短夜長復寒日不暖  
深林火薄鷓鴣滿尾  
頰魴魚游纂纂千年古鐵紫氣纏  
赤帝當之白蛇斷中  
朝老臣雙珮蒼憂心鬱紆寢息忘  
鳳凰在笈驥服箱雪  
埋石棧冰河梁夜何長六龍回轡  
東扶桑

夜何長日苦短夜長復寒日不暖  
蒼梧九疑雲思遠驚  
鴻亂落夫差苑漢家騎尉雙龍蒼  
酒酣起舞隘八荒疾  
風吹沙百草霜玉釭朱火青凝光  
夜何長帝車高轉天



中央

夜何長日苦短夜長復寒日不暖  
櫓槍參旗燭雲罽樹  
樹梅花落羌管江南布衣雙鬢蒼  
歲闌獨立氣慨慷夜  
冠禮樂制孔良路迢無由貢明堂  
夜何長啓明耿耿天  
東方

奉陪神保大王宴朱將軍第聞彈白翎雀引  
并序

白翎雀燕漠間鳥也初世皇命伶官石德閭製白

翎雀曲及進曰何其末有孤嫠怨悲之音石德閭未  
之改而已傳焉戊戌冬淮藩朱將軍宴大王於私  
第逢忝坐末時夜電霰交下衆賓相次執盞起為  
王壽逢亦起王命左右鼓是曲且語製曲之始俾  
歌詠之逢謂續事本實左氏所先故鋪陳興龍大  
略而不暇他及也

玄陰亙天雪欲作將軍西第夜張幕銅盤蠟光紅照灼  
四坐傾聽白翎雀雀生烏桓朔部落大樸之氣元磅礴

地椒野稌極廣莫穹廬離離散駝駱黃羊蘆酒雜漣酪  
鷹狗畋獵代耕獲太王肇基不城郭青春建橐宵罷柝  
聖澤滂沛蔓綿絡風淳俗龐法度約乾端坤倪露沖漠  
羽毛麟介並飛躍庭祠歲饗咽管籥雄雌和鳴莫我樂  
帝皇赫然大陽若八表晃蕩氛盡却前驅屈盧從繁弱  
睢盱嗚咿萬狀錯遂朝玉帛解組縛大明宮開夾花萼  
文監武衛盛材略蔥珩穀璧映霜鍔五雲夔龍奏韶濩  
九苞鳳凰降寥廓德音威儀匪予度萬姓拭目瞻阿閣

軒轅伶倫兩冥冥八十年來事非昨獲塵雜亂人道削  
咬哇哀淫頌聲鑠皇孫讓賢執鼓鐸巾綈鵲尾黃金杓  
殽丞體薦嚼復嚼巴渝舞隊驩回薄供奉革鞞衣狐貉  
銀箏載前酒載酌延秋門深魚守鑰緱山遠度吹笙鶴  
淮南昔者鷄舐藥千乘之國棄敝蹻方今羣雄自開拓  
拔刀把稍爭剌斫為臣義同葵與藿將軍固合鞭先著  
蓮壺漏沈薇露涸枯梢號寒風墮籥百禽啁噍電霰霍  
冰花亂點真珠箔箔中呱呱情陡惡供奉碧爾停弦索

吁嗟白翎將焉託有客淚下甘丘壑

奉陪杭右丞程禮部以文字文憲僉子貞魯縣  
丞道原宴周左丞伯溫館舍時聞河南李平章  
恢復中原

西湖館舍開新秋三峯倒影紫翠流白馬彫戈駐遼道  
金魚玉佩羅林丘二孤五老獨神往八公六逸同天遊  
時維小康況大比萬乘少紓東南憂如澠之酒官寺送  
風生酒波鱗甲動荔子漿凝赤露香鵝肪炙作黃冰凍

歌袖頻熏娑律膏渴羗解奏參差鳳右丞閱霄漢逼  
諸叟文章臺閣重梁愚駸駸落日涼菱花蘂葉掩冉光  
驚飛先自有烏鵲寡宿未必無鴛鴦堯封禹跡煙莽蒼  
宣髮固短憂心長側聞汴破濟欲下百姓亦望臨淮王  
山人厭亂喜莫量笑整冠帶為舉觴醉後不登嚴武牀  
歎病駝

狂夫東遊乘白驪道路適遇病橐駝紫毛無復好容色  
肉鞍尚聳雙坡陀南人從來不夢此私怪目擊臨干戈

泉渠元自控蕃落天苑畢竟連銀河吳郊楚甸水草淺  
任重却欲千斤過青袍朝士為起立茜帽番僧時撫摩  
熱風吹塵鼻出火積雨成潦瘡生窠牛蝨狗蝨苦嘅血  
末由驅除知奈何頻年出師數百萬熊羆獅豹相奔波  
豈期獨後死溝壑餘光所及良已多老奚首帕短袴靴  
手持鞭策涕泗沱憶昔灤京避暑日氣骨礪荒從鑿和  
沈沈金甕夾捫馬裊裊錦帶懸靈囂服勞輦下藉鬚刷  
屈跡澤畔甘蹉跎疇能推廣愛烏義沒齒仰飼公田禾

長樂未央玉璽歌為秦景容總管賦

赤龍銜日照赤子白蛇橫斃烏騅死東風吹冷咸陽灰  
長樂未央連闕起昆吾寶刀截瓊肪陰文小篆雲漢章  
盤螭作紐徑二寸歷歲四百傳天王黃星李明銅爵舞  
銅仙淚泣如絲雨盜將神器竟不歸璽亦漂淪頻易主  
使君購得心良苦君不見豐城有劒氣上衝朱船也貫  
滄江虹陋歌先附蘇卿鴻

歲星漸高贈王伯純進士



歲星漸高辰星光鎮星不動天中央  
熒惑退舍太白歛  
晝芒南斗尚爾雲微茫有美一人被褐裳  
思君思鄉垂  
十霜馭娑駘盪氣鬱蒼王屋石室岌相望  
願陪先驅弘  
四張歲星輔日照八極還種祭田汾水陽

簡鄔同僉

南粵稱臣陸賈勞漢廷何愛璽書褒恩波遂與三吳闊  
爽氣真連北斗高鷺轉羽林交杖杜馬閒沙苑暗葡萄  
天心厭亂民歸德未說關河恃虎牢

送王季德主事祠南鎮還京

千羽春明玉宸間  
皇華躬遣祀稽山  
蓬萊雲霧隨封檢  
敷落仙曹降珮環  
宣室舊承前席問  
樓船今駕海濤還  
東南父老憂時切  
落日扶藜得重攀

秋感六首

吳門葉落季鷹船  
朔堊霜橫白鴈天  
三楚樓臺餘夢澤  
兩京形勢自甘泉  
采雲帳幄冷風滿  
瓊樹花枝壁月圓  
本是宣光中興日  
腐儒長夜泣遺編

紛紛攘攘厭黃巾妖血徒膏草野塵馬化一龍猶王晉  
楚存三戶未亡秦颶風天靜浮青海朔漠山高直紫宸  
莫為鬼方勞外伐檠弧箕服最愁人

豆苗瓜蔓未應稀菰米萸絲積漸肥南極有星天半隱  
東維無地海全歸連城不換相如璧百結何妨子夏衣  
回首故山荊棘外幾年空翠鎖煙霏

茗花薔葉繞林扉獨立蒼寒見紫微夜久長庚隨月上  
天清高鳥帶霜飛東南吳會三江入百二秦封六國歸

烈士莫年心未已無言思解白登園

南越東吳帶楚皋頻年醉眼送飛毛滄洲露白蒹葭滿  
甲第秋聲蟋蟀高九日天涯桑落酒三軍城上柘黃袍  
試觀漢後詩人作獨覺遺風屬阮陶

鯨魚風息淨江波軋軋機絲響薜蘿華髮道途秋日短  
曠裏樓閣暮陰多浮查受宿炎州翠細草從眠墨沼鵝  
心自隱憂身自逸幾時天馬渡滹沱

簡陳韋羗員外

陳基敬初

幕府深嚴午漏遲  
簾文簾影碧參差  
總傳白馬陳從事  
每念青袍杜拾遺  
大地風塵憂未解  
扁舟江海去無期  
涼天鴈叫芙蓉發  
許奏軍中鼓吹辭

陪淮南僚友汎舟吳江城下

波伏魚龍夜不驚  
菱花千頃湛虛明  
吳儂似怪青絲馬  
漢月重臨白帝城  
世說竇融功第一  
獨憐阮籍醉平生  
樓船簫鼓中流發  
喜及東南早罷兵

送薛鶴齋真人代祀天妃還京

蓬萊宮裏上卿班  
代祀天妃隔歲還  
日繞五文皆御氣  
海浮一髮是成山  
風霆夜護龍鸞節  
雲霧朝披玉雪顏  
聖渥既隆玄化盛  
轉輸應盡入秦關

留別陸芳潤張孟膚田仲耘王孟翼

楓葉殷紅枳實肥  
蘋風蕭颯芰荷衣  
自甘許汜求田去  
不擬劉蕡下第歸  
日落大荒獺夜哭  
天含積水鶴雲飛  
諸君有待乘槎使  
直犯星河織女機

題虎樹亭

宋聰禪師住華亭時有二虎噬人師降伏之命名曰大青小青師卒虎亦

死弟子瘞之塔傍踰年生銀杏樹二  
今主僧隱公闢亭樹間扁曰虎樹

舟泊東西客詩招大小青山高白月墮草偃黑風腥植  
物鍾英爽精藍被寵靈涼陰慎翦伐留護石面經

過馬天章水村居

嘉興馬錄判歸築水村居土銍長腰米尊羹巨口魚青  
衫沾露薄華髮向秋疎尚爾丹心壯無時去玉除

近故二首

近故儒林老于予起嘆嗟清秋書柿葉落日賦桃花碑

碣留吳滿雲山向越賒多情楚宮月來照未栖鴉

近故維揚老威儀本漢官才高三禮賦心折一泥丸露

氣金盤濕簫聲珀石落寒空餘茂苑樹鵲血幾時乾

成廷珪寓

維揚卒於至正末  
年二詩為成而作

### 鄰飲

蠟炬繞紅鸞盆花玉露溥無家憎月色多難薄春寒毛  
穎時旌鬼黃金少鑄官西鄰濁酒熟得罄一回歡

### 聞畿甸消息



白草生畿甸黃沙走塞庭直憂星入斗兼畏雨淋鈴殿  
閣餘龍氣衣冠自鵠形吳粳斷供餉隴麥向人青

和惠子及雨中

桃花昨夜愁盡發燕子今春疑不來雪衣鸚鵡亦可怪  
錯喚主人非一回

題李唐江山煙雨圖

煙雨樓臺晝靄間畫圖渾是浙江山中原板蕩誰回首  
只有春隨北鴈還

馬頭曲

馬頭者大都名姬也始為黃禪太子寵黃禪伏誅沒入以賜太平王王薨子騰

吉斯留之騰吉斯被殺復沒賜布克布克國語力士也

和我漢明妃亡吳越西子鬼妾賜元臣孰受盧弓矢  
前時楚襄夢今夕伶玄妾瓊斷藍橋漿紅流御溝葉  
萱圖為李恒題于茂清軒中

暄風宜男花涼日忘憂草一種兩含情親容夢中老

游鯉山

舊名由里山

鄉山三十三游鯉真郊南巍然獨高大秀掩東諸嵐土

剛蓄炎精崖仄削劒鐔我嘗挹飛翠遠在滄江潭波濤  
與伏興雲霧相吐含恍然穆王駕八駿左右驂又如琴  
高仙脚踏朝蔚藍久思更徽號新喜遂幽揆太白賦九  
華後來成美談狂歌繼其武林間免愧慚春風綠瑤草  
秋霜紅石楠行將修月斤為鑿避世龕蛟龍正格鬪鯢  
化誰其堪

次鰕婁岸

常熟州

朝辭鳳巢村晚次鰕婁岸起望大角間太白光有爛方

罹杜陵苦未已崔旰亂鬚毛掠蝙蝠竹裏鳴鶡鴒同曹  
迫憂悸相視名錯喚前途非樂土殊昧賢達筭誰家繚  
崇垣轆轤卧井幹餘歌久悽惋酣宴同清晏寧知楚幙  
烏不寤吳宮燕蕭晨理舟楫回首重悲嘆

讀貞燕記有懷魯道原提學

天涯老孤臣想象賦貞燕空梁泥屢落故渚冰自泮影  
託明鏡鸞夢接長門鴈飛雲軒不歸自語清商怨

元貞二年雙燕巢於燕人柳湯佐之家一夕家人以  
燈照竭其雄鷺墜猶食之雌彷徨悲鳴不已朝夕守

巢哺諸雛成翼而去明年雌獨來復巢其處人視巢  
生二卵疑其更偶徐伺之則抱獨二殼爾自是春去  
秋來凡六稔觀者譁然目  
為貞燕云長沙馮子振記

### 義鄧

吾鄉有鄧添千里負主骨晨夜竄草間宛轉時虜窟肝  
胝苦何辭性命間一髮日車昏盪沒虹暈或抱月魂氣  
相衝塘鳥獸亦獠狘經過百戰地青春暗消歇溪幸主  
有靈全生及城闕主母悲喜集流淚心激越主妾事他  
人空庭自花發主昔為龍蛇公論不可沒但感衣食恩

疎戚均賞罰在家為義奴在軍為義卒庶幾銜土烏尚  
愧擊蛇鶻淒淒薦霜露暫暫上參伐不見秦舞陽悲風  
動天鉞

排難行

贈王  
子中

相如全趙璧子敬存家羶臣子奉君父由來義當然我  
為排難行期播今後賢至正十六年楚氛蔽吳天南臺  
塔御史盡室方顛連風波萍浮寄墟落匏孤懸內無虺  
蜍援外絕鴻鴈傳縮地漫勞想拔宅欲假仙形勢轉倉

皇一日猶三年君聞急友義側身入烽煙得子猛虎穴  
摘珠驪龍淵菱花奩影合桂樹月魄圓青青驄馬駒環  
珥映後先相看喜至骨欲語翻淚漣報之錦繡段長謝  
賦歸田遂令鷄鳴客遠愧齊魯連我時載茶具蕩漾五  
湖船蕭蕭春陰暮載歌伐木篇

贈窮獨叟

窮陰結長寒木介河生澌曠野獨獸號異鄉孤臣悲薜  
衣帶胡繩三年限朝儀宜徒無炊火顧有麻斬齊身幸

免汚辱言之淚交頤脫急藉朱家弔古裏要離遡風酒  
三酹老氣吞畎夸誓剗梟獍肉用塞烏鳥饑漢酬張良  
志吳乞伍負師行歌獨漉篇以繼從軍詩

登崑山寺謁劉龍洲墓

陰崖鼈裙披蕭寺壓其左前無容馬地而公靈永安綽  
有高世風荷畝誓埋我懇懇中興論汎汎岳陽舸竹西  
旌佩間為士非瑣瑣我來行吟久顧影嘆復坐下上百  
年餘同遇時坎坷疎嵐冒川暝歸禽跼跼墮怒焉上孤



舟星流亂漁火

游卜將軍墓祠

將軍名珍字文超唐西河人  
有功業在崑山民至今祠焉

時危短吾裾薄游東崑野有唐將軍瑩肅肅風露下木  
葉金甲動土花碧血洒居然神兵栖夜思石驎馬二蛇  
顧首尾勢若無禦者當時陣或然威福巫得假靈烏拂  
人首疎火散村社淚淚婁江波壯裏託申寫

題留侯小像

漢高三尺劒子房三寸舌剛柔兩相濟秦降楚隨滅君

不見乾坤狡兔飛鳥秋脫使子房無世仇箕栖潁飲老

一作則休

史驪兒

驪燕人善琵琶至治間蒙上愛幸上使酒縱威福無敢諫者一日御紫檀殿飲

命驪弦而歌之驪以殿前歡曲應制有酒神仙之句怒叱左右殺之後問驪不在悔曰驪以酒諷我也前和州同知李澄言於逢欲傳其事逢為賦一辭澄字仲溪開州人翰林承旨惟中先生從子也

虎帖耳豹俛首青天白日雷電走尚食黃羊光祿酒史

驪曲曲春風手蕭王馬蹴滹沱冰亞夫玉碎鴻門斗鳳

鳳鏃翮蚌珠剖趙女舍瑟秦娥罷缶飲中八仙方下來  
御溝濺赤花飛柳君不見龍生逆鱗海岳寒嗚呼史騾  
乃敢干和州孤臣說舊語梨園弟子更新譜

三月十二屬予初度時客舍承朱僉樞攜僚佐  
見過

我生三月之仲丁長庚輔日當奎星命居旄頭身驛馬  
薄有抱負多飄零鸛鸛嘗貫金陵酒蛟龍幸護錢塘輶

乙酉十二月予護母櫬泊  
錢塘鄰舟多為風潮作覆

魯連海上隱行歌吳王臺前

辭下走清齋庚果廿七種短疏劉蕢四三首才名從知

造物惡心臟空夢神人剖

乙亥科舉罷或勸予學律因感異夢見心臟皆五色遂止

茲辰客舍風雨俱湯餅尚少囊中蚨正冠試誦蓼莪什  
衝泥適來櫻筍厨帳士彈箏玉連瑣廬兒執爨貂襜褕  
落花簌簌香埽途閭座氣作思馳驅箕不以簸斗不斟  
仰面大笑眞吾徒

題蔡琰還漢圖

銅臺春深邊草綠琰因名父千金贖殘生既免羶裘鬼

哀哀莫盡蘆笳曲舊時漢妝傭復理感義懷慚歸董祀  
入朝好語亂世雄賤妾不為天地容爾其忠事山陽公

合肥東遂菴學正為畫君山酌月圖長歌奉謝

憶攜蓉城霞

吾鄉酒名

醉賞君山雪興酣俯崖面三酌大江

月靈竒秘怪不可說回首十年塵土熱東卿想像作此

圖如見當時眼為豁是山傑立氣皓鮮四八賓從咸華

顛

吾鄉有三十二山君山為之主

銀濤絲縈料角海

料角地名遠在通州

玉臺鏡

露峨眉煙

峨眉山在君山下

搓牙亂樹拔虎窟撇捩小艇吞龍

淵樵子罷斧僧罷磬木瓢一箇滄茫前君不見江山元  
與天地闢有月無人景虛擲崑崙東來幾萬里衣冠雲  
散三千客三千客後世屢易曉事僅有羅春伯事見龜  
郡志  
趺榴翳鬼照火鼇背蒼涼獸交迹君不見采石紫綺裘  
赤壁洞簫歌樂者信曠達齷齪將如何歲云暮矣雙鬢  
皤夢恍茅屋牽青蘿廣寒白兔下相杵貝闕鮫女趨鳴  
梭卿聞大呌當就隱指日莫問魯陽戈

浦東女

浦東鉅室多豪奢浦東編戶長咨嗟丁男從俗各出贅  
紅女不暇親桑麻鵲鳩呼雨棟花紫大麥飲香勝小米  
一方青布齊裹頭赤脚踏車爭卷水水低岸高力易歇  
反水上田愁漏缺穀種看如瓜子金野鴉不銜田鼠竊  
黃草衣薄風披披日色照面蒼煙姿南鄰北伴更貧苦  
糠粃糜粉隨朝糞阿彌送茶相向語鉅室新為州府主  
妻拜夫人婢亦榮繡幃朱輪照鄉土羊牛下來鷄欲栖  
汪汪淚眼數行啼女自身長苦非一歸路白楊斑竹西

胥門柳

今年胥門十一月楊柳青青寒不脫雕戈白馬黃鬚郎  
朝朝忍見行人別行人吳頭或楚尾心趁飛花度黑水  
避暑鑾輿狩未回都人南望思投箸都人泣向都官道  
塞北江南柳還好風纏露沐恩既殊報荅春光願終老  
君不聞虎狼之秦六國雄可憐千丈泰山松至今稱是  
大夫封

劉夫人



劉夫人至正太尉吳王嬪笄珈車服置弗御澹煙常鎖  
雙眉春中州援疆敵在目叔貴日驕疆日盛背城借一  
王本心狐埋狐搨將軍欲夫人勇決烈女義百口樓居  
親舉燧片時陰慘萬古生月明風清珮音至君不見男  
兒成敗古有之孰以楚霸輕虞姬蘇民安得夫人祠烏  
栖白鳬底少衰

讀閩僧謙牧隱所題鴈宕大龍湫西瀑布常雲  
展旗天柱卓筆雙高峯詩予為之色動隳拈一

首

鴈宕龍湫氣混濛展旗卓筆勢爭雄  
翠腫霄漢雙鸞影玉立東南一柱功  
興入常雲飛夏雪醉看高瀑挂晴虹  
總慚尊者空諸有萬木圍巖夜自風

冥鴻亭偶題二首時歲戊戌

春陰過却幾番風野店山櫻霧雨中  
新水綠塘鵝並浴嫩寒茅閣燕微通  
大兒稍熟春秋例幼女歡趨組繡功  
四十今年渾意足酒炊香滿巷西東

一家無事樂清寧  
寄目冥鴻野外亭  
江水未分南北限  
月明常後畢箕星  
子生猶櫟垂垂赤  
蔓長鴉藤故故青  
天意物情應有在  
且須料理相牛經

聞何上海子敬毀淫祠開鄉校因寄四韻

魚米駢登橘柚垂  
備聞佳政起深思  
女巫罷進神弦曲  
鄉校新陳魯頌詩  
風葉晝埋公館靜  
霜鐘寒度海雲遲  
高天鴻鵠東回首  
亦欲朝陽借一枝

無錫寓隱謝王左丞彥熙携酒饌遠過

玉帳旂旌拂紫冥樓船神物護青萍風雲密擁將軍樹  
江海孤懸處士星深愧草茅優簡拔未忘蒲柳易飄零  
竹西歌吹高陽酒喜為尋春過野亭

十二月廿二日為重陽王真人誕辰是日立春  
在淞江長春道院瞻拜真人及七真像敬題薛  
一山丹房

寒盡東風破曉陰真人遺像儼如臨山中霞熟千年醞  
海上蓮開七朶金朔地興王資化力鈞天朝帝動仙音

私忻泉石膏肓久終日凝神紫氣深

無題五首

五緯南行秋氣高大河諸將走兒曹  
投鞍尚得齊熊耳  
卷甲何堪棄虎牢  
汧隴馬肥青苜蓿  
甘梁酒壓紫蒲萄  
神州比似仙山固  
誰料長風掣巨鼇

天槍幾夜直鉤陳  
車駕高秋重北巡  
總謂羽林無猛士  
不緣金屋有佳人  
廣寒霓仗閒華月  
太液龍舟動白蘋  
雪滿上京勞大饗  
西風華岳弔秦民

白衣舳舻渡吳兵赤羽旌旗奪趙營灤水天迴龍虎氣  
榆林風逐馬駝聲靚妝宮女愁啼竹白髮祠官憶薦櫻  
猶有海鷹神不王駕鶩高去塞雲平

五城月落靜朝鷄萬竈煙消入水犀椒闥珮琚遺白草  
木天圖籍冷青藜北臣舊說齊王肅南仕新聞漢日碑  
天意人心竟何在虎林還控鴈門西

十載羣雄百戰疲金城萬雉自湯池地分玉冊盟俱在  
露仄銅盤影不支中夜馬羣風北向當年車轍日南馳

獨憐石鼓眠秋草猶是宣王頌美辭

後無題五首

一國三公狐貉衣四郊多壘鳥蛇圍天街不辨玄黃馬  
宮漏稀傳日月闌袿紹可能留濺血謝玄那及總戎機  
祇應大駕懲西楚弗對虞歌北渡歸

吐蕃回紇使何如馮翊扶風守太疎范蠡不辭句踐難  
樂生何忍惠王書銀河珠斗低沙幕乳酒黃羊減拂廬  
北陸漸寒冰雪早六龍好扈五雲車

回首崑崙五色天疎風落日重  
回僮駕驂八駿非忘鎬  
臺置千金舊慕燕地限上林雲  
過鴈雪封西嶺樹啼鵲  
遠慚行在周廬士橫草無功日  
晏眠

險塞居庸未易劇望鄉臺上望  
鄉多君心不隔丹墀草  
祖誓無忘黑水河前後炎劉中  
運歇東西元魏百年過  
愁來莫較興衰理只在當時德  
若何

黃河清淺海塵揚陝月關雲氣  
慘蒼寧復明珠專魔社  
尚論玉兔踞金牀衣冠並入梁  
園宴簡冊潛回孔壁光



私幸老歸忘世事梧桐朝影對溪堂

朱竹垞曰無題前後十首皆感悼王

師入燕庚申

北狩之事

覽周左丞伯溫壬辰歲拜御史扈從集感舊傷

### 今敬題五十韻

華夷今代壹畿甸上京遙游豫循常度恬熙屬累朝六  
飛龍夾日獨角豸昂霄御史箴何忝賢臣頌早超咨諏  
新境俗觀采衆風謠文用彌邦典忠惟振憲條執徐當  
景運仲呂浸炎歊愠解民心結煩除聖念焦雨工趨汎

埽市令薄征徃大口誰移蹕庸關肅衛刁縉雲峰立曉  
節月水涵宵徼道臣臣俊清塵騎騎驍豹羈嚴御勒駝  
象妥鑾鑣儀仗真如畫車徒不敢囂侏言來部落皮幣  
贄荒要岳牧恭迎舜封人願祝堯六宮程緩緩列寺思  
飄飄絲裊雙行輦璆鳴雜佩瑤寶鈿榆莢小錦罽草花  
嬌繡襖珠鞵絡香鬟玉步搖娉好辭並載王母會頻邀  
拾翠深沙嶺梯虹複澗橋天長躔北日斗近建南杓珍  
味高陀鼠丹馨散地椒廬兒分逐兔土屋競停雕白貉

衣溫座黃羊酪凍瓢桓城金合沓灤闕紫嶠嶢社稷尊  
王統山河固廟祧明明神爽降秩秩禮文饒寵遂光幽  
朔畋同閱獨苗蹕林圃已舉款塞福皆徼棕殿三呼歲  
楓墀九奏簫祀融回酷暑少昊戒靈飈舊制先回輶良  
辰次起輶謝恩多帝胄紀實得臺僚至治音俱雅於皇  
德孔昭相如慚禪議謀父感祈招最爾蘄興祲紛然穎  
煽妖漕輸橫蜃鱷衡祀闕骨蕭邊警初傳箭軍容半珥  
貂薦添烽堠迫有甚火雲驕袞服中垂拱微垣外寂寥

幾多遺鶴髮曾共望鷄翹二洛遙通晉三韓復入遼不  
無雙國士正賴一嫖姚求劍舟難刻更弦瑟好調扶顛  
須砥柱撥亂豈芻蕘戎幙辭巢父詩壇老伍喬式瞻阿  
閣鳳馴止泮林鴉併論公殊蹟吾知邁董鼐

寄僕正字

君遷正字職秩視校書郎太乙藜分焰銅仙露湛光鴈  
班清漏裏鶴駕霽雲傍署轉宮花密溝迂御柳長芸窗  
填竹素蓬觀啓銀鐺魚豕知訛舛鉛黃屬訂詳聖王經

貫道家世桂名坊一氣根幽朔羣英萃豫章比蒙青眼

待益見白眉良傳癖稱元凱文宗得子昂冠將我獬廌

豺已避康莊大器遭斯運凡材信彼蒼哭親嵐瘴邑懷

友月蘿房病謝臺臣薦書煩驛使將暖餘牛背日寒遠

馬蹄霜野褐方山帽畦蔬德操桑策陳憐賈誼裾曳恥

鄒陽任性何孤僻傷時或慨慷園丘虛墀墮太廟攝丞

嘗珥筆誰丹宸紆金盡玉堂海涵恩靡極袞補責宜償

十樣賤霞粲雙壺酒雪香珠璣新傑作龍虎古雄疆好

約重觴詠秦淮夜對牀

簡夏嘉定

百里繞吳煙重過喜地偏溪城遲閉戶細港倒回船莫  
汐蟬開甲秋原木放綿民風返淳厚正賴使君賢

乙未八月避地前湖三首

兩地初讎殺全家屢死生守臣無大過雄長自相爭魑  
魅闕當屋鵲鷗啼過城前湖落木外排難愧齊卿  
借地安樵爨秋煙滿桂叢禍因貧賤少詩到亂離工有

妹音徽隔諸兒起卧同數畦烏口稻滿待熟天風  
竹底秋光薄牆根朝日暄稍通鄰曲好溪荷野人恩細  
雨菰生米新霜芋長孫加餐向茅屋醒眼看乾坤

丙申八月紀事時自鄉里入吳還華館遂卜隱

### 鴻山

寸舌解重圍長歌振短衣不成巢父去空似魯連歸蔡  
港沙田薄黃山宰木稀伯鸞吾所慕梅李況魚肥

常州江陰再失無錫告罄病中自鴻山將遷海

上

病就山中隱烽催海上舟連城新鬼哭深壁大臣羞赤  
青躔金火炎風汗馬牛遙占女兄弟先已下長洲

至正丙午三月廿八日自橫泖遷居烏涇宋張  
驥院故居有林塘竹石因扁堂曰儉德園曰最  
閒得詩凡六首錄三

卜宅賓賢里生涯始有涯憂緣常念亂貧為數移家徑  
合交枝果簾當獨樹花池臺幾峰石相友卧煙霞



鄰曲敦新好園林恍昔游衣冠時徑入棊枰夜忘收已  
遂尊羹興何煩杞國憂人生貴行樂兩鬢颯先秋  
無才甘在野多懶愜行園石露溥雲氣池風損水痕草  
深眠雉子林靜習鴉孫擬著幽居錄漁樵共討論

得兒掖書時戊申歲

客夢躬畊隴兒書報過家月明山怨鶴天黑道橫蛇寶  
氣空遺水春程不見花衰容愧耆舊猶語玉人車

此詩  
記戊

申歲正明太祖  
改元之年也

舟過吳門感懷二首

躍馬橫戈東楚陞據吳連越萬熊貔風雲首護平淮表  
日月中昏鎮海旗王帳歌殘壺盡缺天門夢覺翮雙垂  
南州孺子為民在愧忝黃瓊太尉知

強兵富境望賢豪戴縑垂纓恨爾曹一聚劫灰私屬盡  
三邊陰雨國殤號江光東際湯池闊山勢西來甲觀高  
形勝不殊人事改扁舟誰酌月中醪

張氏之據浙西也  
原吉有功名之望

焉故首章末句如此其間吳門消息有云盡擬田單取  
故土不期高幹損雄才又云三年弟傲羣情懈十月城

國百戰休尤多痛惜之意至于稱士德為孤  
忠謂東吳為唇齒是則書生之見而已矣

### 題心覺元上人觀露軒

上人吾鄰人跌坐中竺巔澹然觀朝露月落萬籟靜豐  
林始如沐萎萃颯以冷石床仰嵌竇餘滴下微影世皆  
汨塵勞天或示短景忘言理深詣收視妙獨領茂陵和  
玉屑

一作淒清  
蟬暫吸

有恹鶴知警雲深粥魚鳴盂鉢躬自整

### 趙善長山水

畫師今趙原東吳諒無雙寸毫九鼎重烏獲力靡扛翠

樹擁羽旂溪崦敞雲窗參差見罍罍不無酒盈缸老山  
石黃色插脚琉璃江隱若赤壁壘勢壓曹魏邦何當柔  
猛虎蛟鱷遂我降欠伸列仙崖噓咳漁蠻砭

唐昭儀李漸榮辭

日繫苞桑地瓜剖宮闈去尺非唐有庭春草合車斷音  
忝備昭儀奉卮酒御香紫袖纖垂手載拜載祝南山壽  
龍鬚席轉蓮炬移狼角斬天殄突牖不辭隕命同君后  
女三禍前妾忠後無人為語巢賊奴莫使兒知環柱走

宋婉容王氏辭并序

徽宗在北四太子請王婉容妻尼雅滿子上遣之婉  
容大哭曰何忍一身事兩主就輿中奪刀自刎死  
太子嘆異擇地葬之且為立碑曰貞婦冢事載俞  
文豹吹劍錄

二宮有警無嚴蹕賤妾徒為虜雛匹假如青冢向黃昏  
不若金刀照白日白濡一縷願隨終煙沙漫漫霜雪容  
令人想見旌貞石氣敵雙高湖上峯

原古詩於忠孝節  
義之事往往三致

意焉表微闡幽美不勝記  
茲特採其尤者錄之云

夜過蒼墩江隱居

白茅蕭蕭風色昏  
歸人自語煙際村  
我騎蹇驢童抱尊  
記得君家忘却門  
徑穿竹入背江路  
傍是梁朝敬宗墓  
月中對鶴吹洞簫  
露水琤然落高樹

題崔白百鴈圖

為宣城黃  
宜之題

老愚離羣影久孤  
客來笑示百鴈圖  
揩眇試數失兩箇  
莫喻畫意翻令呼  
得非長門報秋使  
或是大窖傳書奴

不然一舉千里高鴻俱其餘  
渙汨碌瑣徒且嘒且息翔  
且呼營營鄭圃田之稷  
睢睢齊海隅之菰  
遑知爾更銜  
爾蘆瓠肥卒至克人厨  
小而曰騏亦就笈  
邇聞澤梁弛  
禁官罷虞麋鹿魚鼈  
同少蘇羽儀好在春雲衢

金世宗太子允恭百駿圖

為舒德源題

金家武元靖燕微嘗謂徽宗癖花鳥允恭不作大訓方  
畫馬却慕江都王此圖遺脫前後幅尚餘龍媒羣角逐  
息鷄草黃霜殺菽王氣榮光等蕉鹿山人塵迷朔南目

溪頭姑飲歸田犢

葛稚川移居圖為友生朱仲矩題

仲矩名禹方

典午三綱紊無紀賊奴內向伯仁死  
辭徵尚蹈公以此終託丹砂去朝市  
千年盛事傳畫史野夫獲睹朱氏邸  
壯肩饑糧幼琴几杖懸藥瓢風靡靡  
長襦老婢手執箠躬驅其羊羊顧子  
兩犍受牽頭角頗顰尾殿隨亦欣喜  
公披仙經瞳炯水琅琅餘音恍入耳  
後驂夫人謝釵餌膝上髻嬰玉雪美  
句漏尚遠羅浮邇若有函關氣騰紫



天丁山靈狀僞僂開鑿空青洞扉啓雲霞輸漿石供髓  
二麗精華晨夜委金光秀發三花蕊飄飄上昇碧寥止  
同時許邁行加砥一門翁孫良可儼波散豆者顙遺泚  
嗟今凡民苦流徙落木空村淚如洗

趙文敏公山水為董竹林山長題并序

公於畫左題云至大三年六月望日為吳彥良畫  
并詩有岸靜樹陰合溪晴雲氣流之句想在鷗波  
亭作也彥良嘉禾人

何山弁山秀可掬上若下若蒼苔綠翰林學士偶歸來  
亭倚鷗波送飛鵲鵲飛盡沒滄茫境上青天倒搖影  
鹿頭舫子湖州歌想帶南風覺淒冷冰盤瓜李進仲姬  
管夫人字生綃畫就復題詩鄭虔三絕世無有於乎何幸再  
見至大三年時

宋制置彭大雅瑪瑙椀歌周伯溫參政徵賦

并序

今太尉開藩之三月適江浙參政周公分省江淮

延飲齋閣歡甚以予避地無錫說王左丞晟勸張  
楚公歸元特出瑪瑙椀曰此宋彭大雅燕饗舊物  
子才器足以當之遂引滿飲之再氣酣思湧率爾  
走筆以紀清賞非求知他人也

小序與本集所  
載稍有異同

詩

曰

淮藩開吳豪俠滿歌鍾地屬姑蘇館相儒獨為緩頰生  
笑出彭公瑪瑙椀血乾智伯髀不腥黃土瑩錯紅水精  
妖墓蝕月魄半死虹光霞氣散且盈隱若陣偃邊將營

彭公彭公古烈士重慶孤城亦勞止天忘西顧二十年  
敵盡東南數千里武侯祝文何乃偉敗由宋祚民今祀  
太湖底寧魚米豐官廨喜與閒門同酒波梳面動峽影  
想見制置師攜飄風中再酌庶沃礫磊胷君不見漢家  
將軍五郡封班氏天與世史功詩狂昭諫客吳越存心  
唐室人憐忠嗚呼尚友吾豈敢醉墨慘澹雲飛鴻

七月聞河南平章凶問

六月妖星芒角白幾夜徘徊天市側尋聞盜殺李上公

窮旅孤臣淚沾臆當時寬猛制崔澤安得受降翻受敵  
上公忠名垂竹帛書生奚為費禕惜東南風動旗黃色  
蒲梢天馬長依北壬寅六月田豐王士誠刺殺李忠襄於濟南城下先是順帝見星變嘆曰  
當損大將馳使戒諭忠襄  
正此詩所謂妖星芒角也

謝中政院判買住昂霄枉過予龍江寓隱

三年江館閉斜曛一日星輶下紫氛老我已非佳子弟  
壯公曾是故將軍未央雙闕雲端見長樂疎鐘月下聞  
還語中原縻絲盡六宮知愛石榴裙

送吳照磨赴李司徒幕兼簡張郎中

司徒分鎮越王臺  
甌婺山光入望來  
堂上修文閒將略  
幙中求舊得賢才  
鑑湖木落魚梁見  
紫塞風高鴈路開  
莫禁白頭狂賀老  
酒船仍蕩月明回

時方  
禁酒

寄婁上俞士平提學陸良貴秦文仲二教授

朱紱青袍映後先  
邇來愁過買臣年  
壚頭相釀囊須罄  
地下誰游劍莫懸  
淮浪白滔迴魯日  
塞氛黃隔姓劉天  
賤名忝在齊民版  
為報新蕪傍泖田

寄陸宅之進士錢思復提學全希言學正

花開花落雪盈顱  
三地相望一信無  
梁震不慚前進士  
杜陵寧是老狂夫  
長淮浪接江逾闊  
南極星聯斗不孤  
想與窮經全學正  
酒香鄰社杖同扶

經游小來涇簡木仲毅

髯參歸隱小郊垞  
亂日曾聞險備經  
風黑浪高羅刹海  
月明天度使臣星  
東都先見逢萌得  
廣武重游阮籍醒  
最是故家春草暗  
杜鵑啼殺忍同聽

夢騎驢

蹇驢雙耳卓東風前導青衣一小童石澗倒涵嵐氣白  
海霞高貫日輪紅桃花芝草經行異鶴髮鷄皮語笑同  
却待朝天驚夢失春醒無奈雨簾櫳

重游澱山

鼇戴小蓬萊方諸宮影開崖根龍洞闢山脈虎丘來疎  
磬重煙水殘碑半雨苔因之裛故國游鴈落清哀

古宮怨二首



萬年枝上月團團一色珠衣立露寒獨有君王遙認得  
扇開雙尾簇紅鸞

誤報迎鑒出禁宮階前草是鴈來紅玉顏豈就秋枯落  
萬一和親在選中

雜題四首

池塘昨夜綠波增偶策交州鬼面藤一雨百花香洗盡  
流春砒上立魚鷹

几杖琴尊共一丘燕歸巢近午香篝游絲不挂山人眼

直趁東風入別樓

水涼風攪一池荷  
睡眼醒來手自摩  
數席雲陰亂疎樾  
髻孫驚報鶴羣過

藻池岸匝水仙開  
滿面香飄玉蝶梅  
遺事罷書山館寂  
鼠狼行過雉鷄來

江邊竹枝詞八首

游鯉客山高刺雲天  
門山小舊稱君插江  
鷺鼻移沙脈  
愁殺浪撞黃歇墳

亂石砑聲大小灣石中無玉作連環楚江風浪吳煙雨  
翠鎖修眉八字山

社酒吹香新燕飛游人裙幄占灣磯如刀江鱗白盈尺  
不獨河魴天下稀

南北兩江朝莫潮郎心不動妾心搖馬駝少箇天燈塔  
暗雨烏風看作標

北望大江南望城席帽馬鞍並山名屏障橫儂是小山漁

泊戶水口風門過一生

石筏橫津蛟莫窺近山張弩或眠旗儂作神衫與神女  
祈水祈風郎不知

巫子驚湍天下聞商人望拜小龍君茹蘆草染榴紅紙  
好翦凌波十幅裙

潮落蟆山連狗沙黃泥鞦浦趁江斜阿儂十指年嬌小  
曾比箇中春荻芽

狗叫沙在蔡港西北歲產荻芽予家  
分佃頃半沙與蝦蟆山鞦浦相連

朱家奴阮辭

淮陰三月花開枳使君死作殊方鬼眼看骨肉不敢收

奉虜稱奴聽頤指經遼涉海三歲久以蝗為糧麥為酒  
爨骸斂骨何足論親見徐山墮天狗今年始得間道歸  
城郭良是人民非主家日給太倉粟殘生猶著使君衣  
攬衣拭淚使君室涼月蕭蕭風瑟瑟回頭還語玉雪孤  
勿辭貧賤善保軀瞻屋未辨雌雄烏

重過望亭新城二堡

丙申冬  
張氏築

憶昔扁舟自西下二堡相望無一舍吳藩判樞翻覆兒  
窄衫小弓矜騎射歸人重經但流水且隴彎彎低復起

長途遺庶數十家三四酒旗風靡靡君不見邠公遷岐  
山衛人城楚丘外患內修古所侔成同敗異嗟世憂

會別馬潁漁

別業歸來千里餘泰山傾蓋喜無如青衫不污新豐酒  
白髮終乘下澤車地入東南空驛騎雪消齊魯足淮魚  
彼行此住情俱得尚約鷄肥落木初

寄錢泰富陳雲軒二遺叟

天轉雲東上六符有懷無寐枕同孤紫芝隱曲歌商皓

烈火殘經補漢儒  
私地春先梅老發  
盛陰雷疾草狂蘇  
祖生遲旦疎殊甚  
不計中流少一壺

喜顏守仁教授留園館信宿

前朝進士過林扃  
信宿論心為竦聽  
雲氣夜蟠雄劒紫  
天光寒入舊羶青  
不同嘉樹生南國  
猶夢鯢魚化北溟  
老我歸田有龍具  
僅堪供卧讀牛經

同誼書記游查山留題淨無餘西南林壑

地湧叢林小翠屏  
海吞孤嶂半螺青  
巖扉老衲忘人我

石甃神丹護甲丁  
吳甸土寒黃耳魄  
秦山草歇白蛇腥  
放歌適在風埃表  
幢節浮空若下聽

辛酉雜題

一作古稟

二首

遺經姑置楚包茅  
新筆恭書蠱上爻  
利盡島溟珠象郡  
道湮鄒魯鳳麟郊  
看雲杖名暮影齊巾角  
滴露酒名春聲落

枕凹自判優游不堪事  
鷓鴣添室翠分巢

是歲征雲南元梁王自縊

權籬莎徑入林堂  
春作無牽午漏長  
音歇野鷺新綠淺  
影浮潭鯽小紅香  
誰家數應中和節  
十畝寒輕二月霜



忍貫緼袍償酒債時人將謂獨醒狂

書西廬時洪武丙寅沿海築城

牀頭鴟卧久空金壁上蝸行尚有琴孺子成名狂阮籍  
霸才無主老陳琳虹霓氣冠登萊市蝙蝠羣飛顧陸林  
環海煙沙翻萬雷連村霜月抱孤衾

秋詞

香散天街靜玉珂露臺風殿夜如何星從河漢淡中落  
秋在梧桐疎處多鸞影不曾離寶鑑蛛絲先已綴金梭

君王繭館詢遺事却擬驚車共載過

書無題後凡三首偶感燕太子丹事

火流南斗紫垣虛芳草王孫思愴如淮潦漫天魚有帛  
塞庭連雪鴈無書不同趙朔藏文祿終異秦嬰袒素車  
漆女中心漫於邑杞民西望幾踟蹰

塞空霜木抱狼雌草暗江南罷射麋秦地舊歸燕質子  
瀛封曾畀宋孤兒愁邊返照窺牆榻夢裏驚塵喪鞬觴  
莫識白翎終曲語蛟龍雲雨發無時

元世祖聽彈白翎  
雀曰何其曲終有

淒怨之  
聲乎

幾年薪膽泣孤嬰一夕南風馬角生似見流星離斗分  
謬傳靈武直咸京九苞雛鳳沖霄翼三匝慈烏落月情

縱少當時趙雲將卧龍終始漢臣名

明太祖洪武七年遣元幼主之子蜜

迪哩巴刺北歸此詩記其事故有舊歸質子及南風馬角之句太祖封蜜迪哩巴刺為崇禮侯故曰瀛封曾昇

宋孤  
兒也

芮庠卿邀費孟彩同知陪酌背孰堂既同晚步  
口號

罷酒出前楹霜寒著面輕林腰煙帛束天角火鋒生卧  
木橋通野疎冒水隔城寬袍曳筇竹俱老愧宵征

題泖塔時主僧賢如愚不在

何年宰堵簪奇觀勢若蛟龍上糾盤秦縣赭衣淪鬼國  
泖係先秦  
曰倦縣梵家寶藏壓驚湍野瞻雨黑重燈夜天卧空

青一鏡寒欲買扁舟占漁戶老緣無力候衡官

甲子冬偶書

雲東亂定少新知江左書來有跛兒才盡罷為文自祭

醒狂寧要鍾相隨  
天家青女催衣急  
漏水金人上箭遲  
却喜故妻原上樹  
十年羈羽託溪枝

乙丑秋書

腰痛非千米  
眊昏漸廢書  
靜知天運密  
老與堦程疎  
綠  
吉黃甘外紅  
鮮白小初兒  
歸共貧樂容  
易歲云除

園館雜書二首

竹樹藏山石  
作門魚缸水  
帶洗花痕  
鶯聲又在鷄聲外  
老不勝官只住村

殊鄉春色不曾濃才力新兼病思慵一枕清風間格磔

半瓶香雪浸芙蓉

香雪酒名

元詩選初集卷六十一

謹案第十四頁後五行濟禮哈坦舊作執禮和台

今改 十七頁前一行赫赫舊作黑黑今改


二十頁前四行達喚噶齊舊作達魯花赤蓮珠

舊作買住今改 三十二頁前五行納琳哈喇


舊作納麟哈刺今改 四十四頁後二行騰吉

斯舊作唐其勢布克舊作孛哥今改 七十三

頁前五行蜜迪哩巴刺舊作買里的八刺今改







總校官候補中書臣吳紹潔  
校對官編修臣馬啟泰  
謄錄監生臣朱坦